

**Thursday, February 19, 2026**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**CM**

Chief Minister Pu Lalduhoma'n Mizoram chu India-a Digital state hmasa ber nih tir an tum tih a sawi.

Vawiin Assembly thutkhawma zawhna leh chhanna hunah he thu hi sawiin, House Leader Pu Lalduhoma chuan ZPM kaihhruai sorkar in Mizoram khaw thenkhata Mobile leh Internet Signal awm lo chu an ngaipawimawh hle a ti a, BSNL nen thawk dunin theih angin an bawhzui mek a, an hmalak mekah a huam loh khaw 20 vel chauh a awm tawh tih sawiin, an zawhfel hunah chuan India ramah pakhatna an ni dawn a, Mizoram chu India-a Digital state hmasa ber nih tumin tan an la a ti a, Artificial Intelligence, AI lamah pawh tan an la tih sawiin, Mizo tawng lehlina pawh a tha tawh hle a, changlung zawka tih tum a nih thu a sawi bawk a ni.

ICT Minister Dr.Vanlalhlana pawhin AI lamah hma an la chho mek tih sawiin, Mizoram sorkar chuan central sorkar siam Bashini app-a Mizo tawng dah ve turin Bashini app chu MoU a ziahpui tawh a ti a, he app hian hmun leh hmunah tawng 22 a let chhuak thei a, amah ngei pawhin a hmang tangkai hle a ti a, he app-ah hian Mizo tawng dah ve turin AI hmang leh college leh university lama mithiamte nen tangkawpin chak takin hma an la mek a, nakkum lamah chuan hman theih a nih a beisei thu a sawi a ni.

Minister chuan Sorkar laipua Department of Telecommunications-in a chhinchhiah danin, tun dinhmunah Mizoramah Mobile/Internet Signal awm lohna khua 54 a awm mek a, chung zinga khaw 21 te chu mihring chen tawh lohna khua a nih thu sawiin, heng khaw 54 zingah hian BSNL ten 4G saturation project atangin khaw 14 ah mobile tower dah turin hma an la mek tih a sawi bawk a ni.



**MUHCS**

Health Minister Pi Lalrinpui'n Mizoram Private damdawiin zinga MUHCS zawm lo te chu an rate a san em avangin sorkarin inremna a la siampui ngam lova, inbiakna a kalpui mek a ni a ti.

He thu hi vawiin Assembly thutkhawma zawhna leh chhanna hunah sawiin, Health Minister chuan Mizorama private damdawiin lian te MUHCS hman tir an duh hle a, hetihlai hian an rate a san em avangin Mizoram sorkar chuan inremna a la siampui ngam lo a ti a, Mizoram pawna MUHCS empanelled private hospital te rate chu a tlawm zawk hle tih a sawi. Minister chuan Mizorama private damdawi in lianah te chuan emergency leh thih leh dam inkar ah chuan luh theih a nih thu sawiin, phai lam damdawi ina in tirh aiin an claim size a lian zawk a ti a, hetihrial hian MUHCS-ah Mizoram-a private hospital empanelled loh awm te chu inbiakna an kalpui mek a ti bawk. Minister chuan tun dinhmunah Mizoram chhunga private

Hospital 16 leh Day Care Centre 3 te bakah Mizoram pawna private Hospital 33 te chu MUHCS empanelled hospital an nih thu a tarlang bawk.

Pi Lalrinpuii chuan kumin February ni 3 thleng Empanelled Hospital a damlo refer mi 2,837 te Bill Cheng Vaibelchhe Sawmhnih Panga Nuai Sawm Pakhat Singnga Sang Hnih leh Sawm Pasarih chu Mizoram Sorkarin a bat sak a ti a, MUHCS atana US Dollar maktaduai 108 puk tur chu Sorkarin Corpus Fund atana dah turin thutlukna a siam avangin MUHCS in ziah luh na fee tih hniam tumna a awm lo a ti a, MUHCS in ziah luh theih hun chu engtik lai pawha inziahlul theih tura hawn reng a ni dawn lova, BPL Card nei lo mi rethei chhungkuate tan Sorkarin MUHCS a inziahlul man tih hniam tumna a awm lo tih a sawi bawk.



## **DRUGS SEIZED**

Excise & Narcotics Department chuan nizan khan Champhai Hospital bul, Kawipui Field-ah Heroin Gram 118.230 (Hawng 10) leh a neitu nia puh mi pahnih – Lalhmingmawii (kum 30) Champhai Vengthlang leh P. C. Rohlupuii (kum 35) Ngur, Champhai District-a khawsa nia inchhalte chu an man a, Heng Heroin man sak te hi thubuui siamsak niin District & Sessions Court, Champhai-ah hruai nghal an ni.

Nizan vek khan Central YMA hnuaiia Central Anti Drugs Squad (CADS) leh Excise & Narcotics Dept. hnuaiia Anti Narcotics Squad te chuan Bawngkawn hmun hnihah Heroin (No. 4) Hawng 33 an man a. Ruihhlo te hi Lianzuali (kum 40), North Vanlaiphai a cheng ni a insawi hnen atangin Heroin Hawng 3 an man a. Hemi hnu hian thudawn bawhzui zelin, ZDU Office bul, Bawngkawnah vek Heroin Hawng 30 dang an man leh a ni a. Ruihhlo man naah hian Zohmingliana (kum 40) leh Lalawmpuia (kum 36) Edenthlar Veng a cheng ve ve ni a insawi te chu an man bawk.

Central YMA hnuaiia CADS ten Heroin (No. 4 an man hi a vaiin Hawng 33 a ni a, a neitu ni a puh mi pathumte hi Excise & Narcotics Department-in dan angin thubuui an siamsak nghal a ni.



## **SASCI**

Special Assistance to States for Capital Investment (SASCI) Scheme hnuaiia Serchhip khawpui chhunga hnathawh mek te chungchang sawihoin vawiin khan Serchhip DC Meeting Hall ah DC Pu Paul L Khuma hoin District thuneitute an thukhawm.

SASCI Scheme hnuaiiah hian Serchhip khawpui chhungah Circuit House, sawrkar quarters te leh District Jail-a quarters sak hna te thawh mek a ni a. Vawiina DC hoa thlirhona neihah hian PWD SDO (Building) Pu Lalrindika chuan powerpoint hmangin report kim chang takin a pe a. Tun dinhmunah hmalakna hrang hrang te hi tha tawka ngaih a nih thu leh contractor ten beisei aia chaka hna an thawh thu a report a ni.



## MIZORAM TRANSFORMATION MOVEMENT

Mizoram Transformation Movement chuan Aizawl khawpui chhung traffic tawt ti ziaawm tura motor intlanchhawk enchain hun rei tak chhung hman chu mipui tan harsatna a siam an ti a, ti danglam turin thawhlehi khan Superintendent of Police Traffic hnenah ngenna an thehluh thu an sawi.

MTM President Dr Lalbiakmawia Ngente chuan two wheeler chuan mi rethei leh harsa zawk veivah kawngah harsatna tam tak a thlen tih sawiin lirthei ke pali nei intlanchhawk tih tawp theih a ni loh pawhin, Two wheeler intlanchhawk chu a rang thei ang bera ti tawp turin sawrkar an ngen a ti a, Two wheeler intlanchhawk chuan lirthei a ti pung nasa tih sawiin khawpui a tawt phah thu an sawi a ni.

MTM chuan mipui aiawha Sawrkar an ngenna chu tihhlawhtlin sak ngei an beisei thu sawiin, hman reng a theih loh pawhin enchainna tal neih nise an duh thu an sawi a, Aizawl mipui tan leh khualzin mite tan thlengin malsawmna leh awlsam zawkna nasa takin a thlen ngei an rin thu a sawi bawk.

